

Monumento di Piscadornan Perdi riba Lama

Representante di famianan ta gradici Minister Otmar Oduber pa e bunita gesto

ORANJESTAD (AAN): Diamarsa devela e monumento dedica na piscadornan perdi riba lama y nan famianan. Srta. Chantal de Cuba, yiu di Sr. Emiliano de Cuba cu a perde riba lama, a gradici Gobierno y Minister Otmar Oduber pa a duna e famianan un lugar bunita pa recorda nan ser keri.

Srta. de Cuba a comparti cu pueblo e angustia cu nan como tambe otro famianan a pasa aden na momento nan tata, ruman, yiu of amigo no a yega cas back. E angustia di e famianan di no sa kico a pasa ta un sentimento inesplicabel. Famianan ta keda carga e speranza di un milagro, cu un dia nan ser keri lo bolbe cas back. Nan a pasa y ta pasando ainda den momentonan dificil. Srta. De Cuba haci un suplica na tur piscador pa porfabor cuida nan curpa y pa percura pa bolbe cas back pa asina nan famianan no mester pasa den e experiencia aki.

Mas o menos 2 aña pasa na momento dos piscado ser perdi riba lama, Minister Oduber conhuntamente cu Centro di Pesca Hadicurari y Santa Rosa a bin cu e iniciativa pa evita un tragedia asina pasa otro famianan y a dicidi pa honra e sernan keri cu no a bin cas back cu e Monumento di Piscadornan Perdi riba Lama.

Durante lunanan Santa Rosa tabata colectando informacion y nombrenan di e piscadornan cu a perde riba lama, pa asina aki skirbi un bunita biografia di e piscadornan, cu a bay den

e manual di seguridad y asina aki recorda piscadornan y famianan, di nan amigo, tata, yiu of ruman cu no a yega cas back. Tambe e manual di seguridad ta pa preveni otro famianan pasa door di e experiencia cu Srta. Chantal de Cuba y otro famianan a pasa aden.

Ta hopi importante pa famianan tin awor un lugar unda pa semper nan por bay pa ta poco mas cerca di nan ser keri, un lugar cu ta haci cu e piscadornan cu a perde riba lama ta semper cerca di comunidad di Aruba.